

摘藻堂四庫全書薈要

集部

欽定四庫全書薈要

集部

唐文粹卷五十七

八

詳校官候選知縣臣吳甸華



欽定四庫全書蒼要卷一萬九千八百八十集部

唐文粹卷五十七

宋姚鉉編

碑九 總七首

使相三

唐太尉中書令西平王李晟神道碑

裴度

唐檢校司徒中書令咸寧郡王渾瑊神道碑

權德輿

唐司徒中書令許國公韓弘神道碑

韓愈

節制四

唐四鎮北庭行營節度使扶風郡王馬璘神

道碑

常袞

唐贈司空范陽大都督忠烈公李楷神道碑

楊炎

唐贈涼州都督隴右節度大使郭知運神道

碑

張說

唐邠寧節度使史孝章神道碑

劉禹錫

唐太尉中書令西平王李公神道碑銘

并序

裴度

惟天錫成命於我唐保茲國祚生此人傑則西平王李
公其是乎不然何覆暴如風振槁葉戴君若鼇冠靈山
橫流之中一匡而定公諱晟字良器其先隴西人後徙
京兆曾祖高皇岷州刺史祖思恭皇洮州刺史贈幽州
大都督考欽皇左金吾衛大將軍隴右節度經略副使
贈太子太保代有名跡雄於西土公幼好學學不為已

及讀呂張孫吳之書慨然有經邦濟物之志未弱冠遊秦涼間元侯宿將見者咸器異之乾元初嘗客武都值酋豪以缺守遘亂殺掠平人公與所從十數騎馳而射之殪其為魁者餘黨遂遁寇所虜獲積如丘山公一無所取椎牛醜酒享士而去邦人感服具狀以聞特拜左清道率飾以金紫將朝京師自獻方略屬裔夷紛擾有土急賢河隴將帥相繼表用歷二府右職所至常以才謀為其委重累遷至光祿太常卿階爵在第一品涇原

四鎮北庭節度都知兵馬使懸識虜態周知地形應變
不窮有奪有待驥驟庭而莫展雲出岫而斯飛代宗徵
以左金吾衛將軍為神策兵馬使屬羌蠻犯蜀朝廷濟
師命公督禁旅絕棧道而往救焉公銜枚過險出賊不
意連下堅壁遂誅首惡還授檢校太子賓客且復舊職
建中二年田悅以魏叛德宗極意致討悉起徂征以公
為神策先鋒都知兵馬使加御史中丞與河東河南等
道諸軍合擊公濟河而行能以衆正及破洹水陣解臨

洺圍轢魏屬城抵燕通邑其摧鋒劔銳皆先羣帥而實
力焉遙拜左散騎常侍兼御史大夫厥功未成聞賊泚
肆逆皇居失守西嚮慟哭載馳載驅行及代北授檢校
工部尚書充神策行營節度公提孤軍募散卒拊循訓
勵以達行在值懷光中叛大駕再遷加檢校右僕射餘
如故尋轉左僕射同平章事兼京兆尹神策軍京畿鄜
坊節度觀察使管內及商華等州副元帥公固守渭城
決平秦壘調食制用先發我私捐甘攻苦皆自我始每

一言一誓聲淚俱發勇夫義士感而使之葺不濟矣時
自雍而東延於汝洛震於河汴所在征鎮亂掠相從公
介巨盜之間使聲援斷絕立成師之法致號令嚴肅蒐
捕十旬指揮一舉乘墉壑而通軌道磔梟獍以清宮禁
俾九市三條無輟肆之驚無秋毫之犯羽書速告鑿輅
爰歸廓氛稜為祥光攄憂憤為喜氣詩曰允矣君子展
也大成斯之謂歟考古視今論功稱忠者多矣若至危
而安至難而易卓犖跨邁如公莫儔拜司徒兼中書令

俄以允孳未寧邊防猶警岐下任重乃以本官兼鳳翔
尹鳳翔隴右節度觀察使及四鎮北庭涇原等州副元
帥改封西平郡王加食邑實封至一千五百戶公名懾
戎王政和藩部始至而生植少安而訓齊逮四載賦輿
十倍其初會課入輔拜太尉中樞如故人或謂公勲望
已高寵渥已極宜從容頤養稍稍遜避公曰不然人臣
外則盡心若止偷榮孰為且哲故每承帷幄之間則言
咈無隱理奪不回大指以東夏可平西陲可復或已行

而事終不顯或未用而身遽不遺以貞元九年八月四日薨於位春秋六十七德宗撫几哭於別次自都邑達關畿無士庶無老幼皆發哀相弔則曩時安人戢兵之德可謂浹於元元之骨髓矣冊贈太師賻賙加等以其年十二月十六日葬於高陵縣奉正原鄭國夫人杜氏祔焉自捐寢至安宅皆上所辦護中貴反覆萬情所奉如不及焉嗚呼以公之靜難扶傾不言所利雖存歿極位始終殊禮而天意若曰其福享未至故迤延於後有

子曰愿故檢校司空河中節度等使贈司徒五列雄鎮
三為上公曰聰故光祿寺主簿曰總故太子中允贈兵
部郎中曰遜左神武大將軍贈洪州都督曰恕故光祿
卿贈右散騎常侍曰憑故右威衛大將軍曰憲檢校左
散騎常侍嶺南觀察等使進因貴胄達以善政曰愬故
檢校左僕射同中書門下平章事贈太尉克廣前修仍
執醜虜曰懿故渭南尉曰聽檢校司徒義成軍節度使
統戎按俗是以似之曰憇右羽林將軍曰憇嵐州刺史

並地勢吏用兼而有焉粵大和元年秋七月聽拜疏上
言以公之徽烈則御製碑文於渭川矣以公之風度則
詔命圖形於雲臺矣唯大其丘壟鬱彼松楸望有祁山
之象拜無峴首之碑將刊貞石式表幽隧乃命臣度稱
伐言詩其詞曰

建中季年大盜忽焉皇輿避狄狩於梁川顧謂太師汝
才汝略將威致討必殄冠虐太師泣奉捐軀誓衆度其
成城可以利用赫矣鋪敦傳於牆垣手搏足跡如衝如

援一鼓而破一麾而奔掃清宮闈刷蕩妖昏我師莅止
我令行矣都人不知已事方喜飛章告慶飭駕言旋鴻
烈耀古謹聲動天車服之錫河山之誓九命而俯一心
若厲俾侯於岐阜安邊陲藩政既成袞職攸宜嶽降帝
賚矢言詭詞我后嘉猷我躬何為道直氣和勞謙終吉
福履所綏未至萬一上天不惠厚宥遙歸垂裕流光用
延恩暉翼子肥家將壇台席繼立竒功代傳休績聽與
伯仲永懷高蹤請於朝廷表是丘封帝曰孝哉胡可不

從宣我祖之不業繁爾父之嘉庸乃詔作銘以觀億齡
唐故朔方河中晉絳邠寧慶等州兵馬副元帥河
中絳邠節度營田觀察處置等使元從奉天定難
功臣開府儀同三司檢校司徒兼中書令河中尹
上柱國咸寧郡王贈太師忠武渾公神道碑銘

并

序

權德輿

天地訢合以生百嘉其成歲功也則有震耀肅殺之助
焉君臣保乂以熙百志其講武功也則有經綸翼戴之

輔焉龍蛇起蟄山澤通氣與運相值有開必先斯太師
所以宣力四代稽暮七德輝燿威靈勤身濯行霆征風
行乃緝熙于光明故琯戈淑旂以嚴師律黃流玄袞以
正台曜湛露彤弓以覺報宴納書追命以榮恤禮蕃錫
始終如公之功公諱城字某其先夏妣之後為淳維漢
劉之代為渾邪或強為國或分以姓貞觀中開置州壤
就加官師曾祖元慶皇豹韜衛將軍靈丘縣開國伯祖
文壽皇太子僕贈尚書左僕射考釋之皇開府儀同三

司太常卿兼御史中丞寧朔郡王贈司空惟靈丘紹先
公之職居次卿之重僕射以積厚克家寧朔以偉才雄
邊貴仕崇勲乃列茅社流光追遠是加密印迴復介社
間生元臣功昭於前人德合於大君建中癸亥翠華西
狩公以大司馬艱貞翼從部勒戎車揣摩殺機勤勞行
內為上心膂登壇授律誓命交感如漢拜淮陰侯故事
而又加焉乃進左揆遂叅大政摠賦輿而為之師長恢
王略而以之北伐允黨盡銳壁於武亭公以事鉅師老

則傷威重正合奇勝在於疾力奮寡擊衆鼓行無前殲
夷潰弱如建瓴水中堅席勝又覆於咸陽長轂啓行既
門於延秋會西平王以東諸侯之師清宮獻捷公乃抑
其賈勇須彼成功室士心之尅伐息兵火之氣燄然後
窮追斬級寇孽以平備法從於清蹕捧大明於黃道告
廟薦功登拜上台撫封尹正復與虜會時北平王出大
鹵收絳臺而公已總成師下左輔於是輯忠力揚奇鋒
復離宮拔堅壘衝陣壓境傳於蒲津金鼓之聲氣相合

山河之表裏皆復渠魁授首師帥協附安流以濟方軌
而前士不懼傷工不易肆殄寇正刑四方咸蘇論道進
律乃平水土秉誼靖人以修班制休嘉賁於草木利澤
逮於鰥寡言為軍志動為吏師貞元丙子政成一紀進
掌邦教遂居右弼十五年冬寢疾十二月辛未薨於理
所享年六十四皇上悼歎不視朝五日冊贈太師賻襚
弔祠有司備物大僚襄事明年二月甲申葬我太師於
萬年縣洪固原太常跡其功德奏諡曰忠武禮也初公

年十一以將門子仕於邊部未弱冠五遷至左驍衛將軍始從朔方之師戰黑山次從隴右之師摧石堡又嘗西出臨洮奪昆夷之善地而為之壁壘北絕大漠破獫狁之堅甲而焚其廬帳又從汾陽王臨淮王討反虜於山東攻贛皇北取真定射其特將李立節貫於左肩斃之又五遷至太常卿皆以功次其間開地於河曲以靜九蕃宣威於陝西乃定三川凡王師之所以剋獲都邑元老之所以發揚蹈厲公必居其先偏而當其勅劇故

以御史中丞為靈州左司馬以御史大夫為邠州刺史
以工部尚書為單于大都護專征上郡榆林之地入為
左金吾衛大將軍又以戶部尚書奉普王出車之重自
時厥後投艱感槩能納大忠以恤大事理蒲十六年再
陟公台以司空兼侍中以司徒兼中書令大凡歷官二
十八次真食千八百室居節制者五副元帥者四材力
絕人始封樓煩方內洽平乃進咸寧凡汾陽王九伐之
勲公皆左右四履之地公皆踐歷憫冊師禮法謚尊名

公皆如之所不至者壽而已矣惟公厚性寬中智謀深
靜秉義類以賦明命植端誠以紓王慝講功述職遠意
長利執德之柄蹈禮之輿致其用以格天啓其心以沃
聖協建皇極為宗工元龜雅好左氏春秋班氏史得考
父之恭范宣之讓驃衛之功略黃韓之教化又嘗慕太
史自叙著作行紀一篇詞不矜大而事皆明備有子五
人曰殿中少監鍊太子中允鎬太子司議郎鉅櫟陽尉
鋼雲陽尉鐵著位於兩宮以奉朝請試吏於縣內以修

事任食德而才稟訓而忠皆以純孝致其哀敬令弟輔
國大將軍右領軍衛將軍武當郡王玘與諸孤等推丞
彝景鍾之義因識表以聞有詔詞臣刻石傳信乃採其
贊書侯表作神道銘銘曰

北戴斗極陰方尚武玄金朱幡錫命都府太師間代感
會雲雨四征庇人九合尊主昔未成童則能肆勤卓行
深入致果忘身弱冠摧鋒環列南軍中興之後書社策
勲援枹兩河轉戰三秦靈翔郇邠所居必聞出統藩衛

入司徵巡時丁厄難節冠羣倫逋誅煽宿狂穢宮闕西
平鞠旅公亦授鉞既臨延秋如火烈烈休士退舍時惟
不伐稜沴濛濛蒲津未通北平釋位公實撫封胥命長
春克成厥功開壁勞軍靡有不同以律則臧在和而克
時惟太師有嚴有翼乃敷仁澤乃布條職時惟太師有
功有德三公二府是獎是陟遜印易名以尊以飾材官
介士鹵簿悽惻大隧鮮原中南之北萬邦作憲永代是
式追琢馨香與唐無極

唐司徒兼侍中中書令許國公贈太尉韓公神道

碑銘 并序

韓愈

韓姬姓以國氏其先有自潁川徙陽夏者其地於今為
陳之太康太康之韓其稱蓋久然自公始大著公諱弘
公之父曰海為人魁偉沈塞以武勇游仕許汴之間寡
言自可不與人校衆推之為長者官至遊擊將軍贈太
師娶鄉邑劉氏女生公是為齊國夫人夫人之兄曰司
徒玄佐有功建中貞元之間為宣武軍帥有汴宋毫潁

四州之地兵士十萬人公少依舅氏讀書習騎射事親
孝謹侃侃自將不縱為子弟華靡遨放事出入敬恭軍
中皆目之嘗一抵京師就明經試退曰此不足發名成
業復去從舅氏學將兵數百人悉識其材鄙怯智勇指
付必堪其事司徒竒之士卒屬心諸老將自以為不及
司徒卒去為宋南城將比六七歲汴軍連亂不定貞元
十五年劉逸淮死軍中皆曰此軍司徒所樹必擇其骨
肉為士卒所慕賴者付之今見在人莫如韓生且其功

最大而材又俊即柄授之而請命於天子天子以為然
遂自大理評事拜工部尚書代逸淮為宣武軍節度使
悉有舅氏司徒之兵與地衆果大悅便之當此時陳許
帥曲環死吳少誠反自將圍許求援於逸淮嗾之以陳
歸汴使數輩在館公悉驅出斬之選卒三千會諸軍擊
少誠許下少誠失勢以走河南無事公曰自吾舅歿五
亂於汴者吾苗薈而髮櫛之幾盡然不揃刈不足令震
駭命劉錡以其卒三百人待命於門數之以數與於亂

自以為功并斬之以徇血流波道自是訖公之朝京師
二十一年莫敢有讙呶叫號於城郭者李師古作言起
事屯兵於曹以嚇滑帥且告假道公使謂曰汝能越吾
界而為盜邪有以相待無為空言滑帥告急公使謂曰
吾在此公無恐或告曰剪棘夷道兵且至矣請備之公
曰兵來不除道也不為應師古計窮變索遷延旋軍少
誠以牛皮鞵材遺師古師古以鹽資少誠潛過公界覺
皆留輸之庫曰此於法不得以私相餽田弘正之開魏

博李師道使來告曰我代與田氏約相保援今弘正非其族又首變兩河事亦公之所惡我將與成德合軍討之敢告公謂其使曰我不知利害止知奉詔行事耳若兵北過河我即東以兵取曹師道懼不敢動弘正以濟誅吳元濟也命公都統諸軍曰無自行以遏北寇公請使子公武以兵萬三千人會討蔡下歸財與糧以濟諸軍卒擒蔡姦於是公為侍中而以公武為鄜坊丹延節度使師道之誅公以兵東下進圍考城克之遂進迫

曹曹寇乞降鄆部既平公曰吾無事於此其朝京師天子曰大臣不可以暑行其秋之待公曰君為仁臣為恭可矣遂行既至獻馬三千匹錦紈綺纈三萬金銀器千而汴之庫廩錢以貫數者尚餘百萬絹亦合百餘萬匹馬七千匹糧三百萬斛兵械多至不可數初公有汴承五亂之後掠賞之餘且斂且給恒無宿儲至是公私充塞至於露積不垣冊拜司徒兼中書令進見上殿拜跪給扶贊元經體不治細微天子敬之元和十五年今天

子即位公為冢宰又除河中節度使在鎮三年以疾乞
歸復拜司徒中書令病不能朝以長慶二年十二月三
日薨於永崇里第年八十罷朝三日贈太尉賜之布粟
其葬物有司官給之京兆尹監護明年七月某日葬於
萬年縣少陵原京城東南三十里楚國夫人翟氏祔子
男二人長曰肅元某官次曰公武某官肅元早死公之
將薨公武暴病先卒公哀傷之月餘遂薨無子以公武
子孫紹宗為主後汴之南則蔡北則鄆二寇患公居其

間為己不利卑身佞辭求與公好薦女請昏日月既至
卒不可得則飛謀釣誘以間染我公先事候情壞其機
牙姦不得發王誅以成最功定次孰與高下公子公武
與公一時俱授弓鉞處藩為將疆土相望公武以母憂
去鎮公母弟充自金吾代將渭北公以司徒中書令治
蒲於時弟充自鄭滑節度平宣武之亂以司空居汴自
唐以來莫與為比公之為治嚴不為煩止除害本不多
教條與人必信吏得其職賦入無所漏夫人安樂之所

在以富公與人有所畛域不為戲狎人得一笑語重於金帛之賜其罪殺人不發聲色問法何如不自為輕重故無敢犯者其銘曰

在貞元世汴兵五獠將得其人衆乃一喝其人為誰薛姓許公磔其梟狼養以雨風桑穀奮張厥壤大豐貞元元孫命正我宇公為臣宗處得地所河流兩壩盜連為羣雄唱雌和首尾一身公居其間為帝督姦察其嘖呻與其睨眴左顧失視右顧而跽蔡先鄆鉏三年而墟槁

乾四呼終莫敢濡常山幽都孰倍孰扶天施不畱其討
不逋許公預焉其賚何如悠悠四方既廣既長無有外
事朝廷之治許公來朝車馬干戈相乎將乎威儀之多
將則是矣相則三公釋師十萬歸居廟堂上之宅憂公
讓太宰養安蒲坂萬邦絕等有弟有子提兵守藩一時
三侯人莫敢扳生莫與榮歿莫與令刻文此碑以鴻厥
慶

唐四鎮北庭行營節度使扶風郡王贈司徒馬公

神道碑銘

并序

常袞

皇帝使常侍以故征西扶風郡王臣璘功行之錄詔門
下侍郎平章事臣袞曰古諸侯大夫計功稱伐書於太
常勒之彝器德勲高故其文懿事業實故其言遠有國
之大經也納忠於王室豈褒紀之禮闕歟宜文其頌聲
以昭示承休於豐碑焉臣謹按司勲之戎籍史官之年
表而叙之云聖上稽黃虞之道以武功文德統御天下
赫赫明明罔不率俾唯犬戎自擅寇於我西土而猶懷

以威德久而浸驕時乃大稽命將考之令典惟三年夏
六月庶邦百辟洎侯王列將咸會於明廷乃大誥於爾
在位有能典我西師僉曰璘哉是用詔以鷹揚之命於
夏有鸞旂瑠戈之賜公拜手稽首不敢辭難遂帥師朝
那弭節涇流恢耀武威以臨於戎狄既至乃以戎服立
於軍門之外奉敷天子之威命而訓於將軍列校六正
五吏三軍之大夫曰惟昔盛明必有憂難其在殷高宗
也有鬼方之征其在周文祖也有昆夷之患秦以安定

北地戎狄內侮漢以金城隴西氐羌入寇故遣率以守
衛中國修戰而高尚武力國家道德盛於殷周甲兵富
於秦漢亦有邊患尚勞睿謀則疆臣之罪也將何以塞
責誓將上奉神武之算下憑戎士之力鼓行而前殄殲
羣慝詞情抗厲風雲動色於是軍舉法以誓之令簡而
一衆畏而服雖嗷喑老將聞而竦然乃周覽其山川以
備其戰守有若犀兕其威驅豸其勇屹立而不動者持
重之將統馬禦於水碇之衝蒙輪超乘縵胡突鬚耽盼

而橫奮者雄毅之將董馬捍於華亭之陰輕軒飛翰闐
闐桓桓隸於射聲校尉以出松谷百夫之特萬人之敵
屬於車師後部以殿銅城火渠門之旗舒於大回川雷
密須之鼓殷於都廬山周之以木樵校聯布之以蘭石
渠答部勒既定天地肅然遂使魁健氣索猛鷙魂駭卻
略引去不敢近塞故八年之間再寇而已此皆親稟睿
略協用武經前後獻功悉如宸旨方將大復流沙遠收
故地奪我良將罔卒西事以大厯十一年月日薨於戎

府春秋五十六天子廢朝而歎曰安得雄邊威敵之臣
如扶風乎遣中使以迎喪顧近侍而流涕其至第也百
官會弔其遺奠也五校啓行賄以車馬含有貝玉所以
褒大勲也初公自二庭統甲士三千赴鳳翔行在遂陳
滅胡之策先皇帝竒之曰吾無憂於東方也遂戰青渠
陣澧水收二陝復三川衛南以百騎破五千河陽以一
旅摧十萬史朝義悉師自將大戰邛山國家以天下勁
兵夾攻未動公獨率所部不陣而馳偃旗先登闕如虓

虎鬪酣披靡橫貫而出迴戈奮擊虜陣始破交突數合
轟然大潰時副元帥太尉光弼壯之曰吾用兵三十年
未見以少擊衆雄捷之若此每有征伐大計悉咨訪焉
斯亦羣帥之傑既而移軍右輔疾援河西固已離之心
存將棄之地及聞僕固懷恩之變即日旋師萬類千羣
延蔓山谷輕行轉鬪虜殺而歸屆於岐都寇已四合公
乃持滿外嚮坐入懸門未及解甲背城出戰戎師北走
數騎前追背血橫灑朱殷金甲觸戟而墜應弦而倒者

數千萬人可謂三軍之絕也至於理鄭國撫潁封化郇
邠寧上郡勤於藩職惠於長人勞徠流庸贍卹孤老縑
綜綿纊工於織絰入而有制故大東之刺不作禾麻菽
麥業於播藝用之有節故自北之化可懷此又列郡之
率化也公字某扶風人也自秦漢至於國朝公卿大將
軍通侯二千石踵武王室休有烈光曾祖昭朝散大夫
新豐縣令祖正會石威衛將軍扶風郡公贈光祿卿父
晟左司禦率府兵曹叅軍贈太子少保忠孝在門文武

繼代宦婚之盛士族有輝惟公勲曾華茂雄姿高爽少
有四方之志以才氣自任擺落凡格不嬰細微故弋獵
畋漁嘯咤川澤年二十讀伏波傳至大丈夫當於邊野
以馬革裹屍而還慨然而歎曰豈使吾祖勲業墜於地
乎由是愾憤邊戎徘徊孤劒遂西至絕域以竒功累授
裨將歷金吾將軍殿中監太保御史中丞遷御史大夫
領北庭行軍使邠州刺史加工部尚書節制涇原以鄭
頰二州諫之尋拜右僕射知省事階至儀同進封異姓

副軍以降略而不書以英明之識遇聖明之運故得竭
其智謀極其任遇抗大節以激危難攄洪仁以庇傷殘
公之理軍也以穰苴兵法孫子十三篇先以正合終以
奇勝閒廓深邃應變無端與之安與之危故可合不可
離同其敗同其成故樂死不樂生至於木罌濟河登山
拔幟解鞍而卧鞭馬而馳兼之有餘亦不差異嘗以家
財二百萬贍三軍與其散已食於行伍陳賜金於廊廡
何相去之遠哉公之事君也奉之以實納之以忠造膝

前籌詞禮明順檢身無過恭謹畏慎祿賜所加則受小
辭大任使所及則履險讓夷以忠材而親重有絳侯之
遇也以簡質而倚愛有吳漢之信也所謂國之神將朝
之蓋臣終慶於家永於福祚鍾石享於祖考帶礪傳於
子孫宜哉嗣子盱等重族之盛餘業承家哀哀執喪痛
結天壤萬家葬地能誠昔賢十里丘封亦非遺志獲承
君命欽率朝經請諡嘉名謂之合禮銘曰

戔戔雍城積高氣靈氣主金行良將乃生琅琅司徒雄

略縱橫耽耽其視震震厥聲四方靜難二紀操兵初奮
厥武車師戎府鐵馬蛇矛大黃白羽天山瀚海歎薄風
雨驍騎三千披荆謁主從我撫軍擊胡滅虜迴戈涼野
解敵岐下烈烈英風橫飛西土遂佩玕璜分雄祭戟寵
臨方鎮迺蔚迺赫洪稜遐振虜氣外折惠化滂流人心
內結昆夷先零白旆至涇受算宸扆朱旗撫征密陰前
塞義渠故城丘巒陵谷遠近相屬澶漫傾合紆餘迴復
野戰高秋金羈馳逐左揮右射虎捷神速番渠愕視百

姓推伏國於扶風祚爾嘉庸位長庶寮鴈行三公王用
蕃錫我有鼓鐘叔父昆弟燕私邕邕功成身歿寵厚厥
終周漢二宣皆有勞臣北征西討出車鑾鑾今我司徒
實同厥勲勲在王室光昭後昆

唐贈范陽大都督忠烈公李公神道碑銘

并序

楊炎

秦霸也張祿去魏漢興也淮陰離楚龍鳴風雨之會蛇
變泥蟠之中逶迤感通精氣相合斯冥契也豈人力也

皇唐贈司空范陽大都督李公諱楷其本出於隴西八
代祖節後魏鴈門太守燕齊之亂族沒鮮卑東遷號良
將之家北部實大人之種其生勃碣其居戴斗海塞迴
抱興公之氣天星下直為國之祥英氣混茫熊據龍驤
望其形得山河之狀覩其銳見金鼓之威神明為徒義
勇為器久視中以驍騎歲入於遼西臨太原南震燕趙
雲火照於河上天兵宿於北門朝廷憂之有命招諭合
以信誓際於天人話言感寤撫劒歎息是歲以控弦之

士七百騎垂橐入塞解甲來朝以其本枝復賜李氏授
玉鈴衛將軍左奉宸內供奉圖形雲閣之中置酒蓬萊
之上君臣相賀羽衛生光君子曰井谷不可以游龜龍
蟻垤不可以戴松柏漢於是始靖虜於是始憂是後殪
靺鞨於鴨綠之野覆株胡於榆關之外北出障塞懷其
王庭南救河源復其死地石壑之役以一旅定三軍冷
陪之師以虛聲破精勁東封之歲外將天軍河湟未寧
西護監牧雲麾鐵騎山動地踴右據清海北登狼山冰

泮則會師風高則出塞皇威振於四海王化敷於無外
故得大命三錫天馬輅駟定國難者兩朝拖侯服者四
紀會兵車者百勝出帳下者千人國有事未嘗不勤勞
無私可謂知禮於戲天道曖昧胡星未殞以營平之年
不終大用以伏波之病再出窮荒天寶元年五月二十
日自河源薨於懷遠縣之師次春秋六十七贈營府都
督明年詔葬於富平縣壇山原維公智之大實神之異
門心和體剛慮遠精徹思乎耳目之外行乎變化之中

震呼戎獯嘯吒風雲貔虎之悍以禮成百萬之強以謀
勝故鮮卑因之以疲中國天后取之以空大漠於中宗
開朔方之地四百里於睿宗食佐命之邑三千戶於玄
宗則主禁衛吞諸戎東西南北動罔不尅禦戎安邊凡
十命焉祚於後也元子太尉中書令東都河南江淮等
道副元帥臨海郡王光弼少子太保御史大夫渭北鄜
坊等州節度使武威郡王光進負河圖以列四星遇英
主而當三傑肅宗之功復區宇更為桓文今上之道訓

華夷並為召畢乾元中天子以公炳德丕赫積仁流慶
大福再成沒而不朽乃命太常追考功績諡曰忠烈贈
司空范陽大都督夫人贈號韓國夫人於是建廟堂命
宗紀室有山龍之服樂有鐘石之和昭宣令圖是有銘
篆銘曰

茫茫上象降精於北是生純臣其在異國矯矯府君蔚
其英靈蛇蟠斗極鵬化南溟來於本邦會此天庭風驅
虎旅晝食狼星綿綿塞草天隔華夏北距陰山野無胡

馬殊勲大績玉劔玄社天推武庫海折崑崙在昔遺慶
惟魯臧孫曰聖在天勤於至道既命太尉又崇太保一
門四龍二作元老赫赫元老氣含清真白髮重冠高堂
有親帝命韓國祚於夫人亦詔薊丘下寵明神彼丘之
榛比石之磷悠悠令德萬古清塵

隴右節度大使贈涼州都督郭公神道碑銘

并序

張說

四序平分清秋之氣勁五方異俗崆峒之人武故隴上

多豪山西出將其有雲龍感召星象特生金鼓登壇隱
如敵國麾幢指塞自比長城得之於太原公矣公諱知
運字逢時其先太原著姓今則晉昌人也本乎文王之
弟是為虢叔虢或云郭因而氏焉自燕昭尊隗以築宮
漢祖封亭以列國其侯於陽曲宅彼太原舊矣亭之玄
孫友從太原徙隴西昭帝分隴西置西平郭氏又為郡
之右族友之昆孫武威太守憲憲之猶子散騎常侍芝
俱有名跡見於魏晉則晉昌諸宗散騎之後也爾乃一

門連譽時人號曰三儒四海齊名天下謂之八凱光祿
派分於馮翊廷尉世茂於潁川孝則天錫釜金忠則帝
章冕服仁則猛獸不害信則童兒不欺豈直介休見有
道之碑洛陽聞立德之傳而已曾祖欽瓜州大黃府統
軍上柱國祖才朝議郎瓜州常樂縣令上柱國父師朝
散大夫上柱國贈伊州刺史殯鹵之地戎馬生郊業戰
鬪而弘勲仕州縣而為達啓莫京之絲福不在於其身
積無聲之善慶必流於後嗣公太白之精雷泉之靈膺

家之禎為國而生身長七尺力能扛鼎援臂虎口虬鬚
鶚瞠射穿七扎劍敵萬人子卿路逢遙識將軍之相唐
舉一見足辨封侯之骨解褐以善戰授昭武校尉秦州
三度府左果毅以敗狄北庭加遊擊將軍沙州龍勒府
折衝兼右金吾郎將瀚海軍副使以軍界破虜即授其
州刺史進當軍經略使朝廷以未愜前除且有後命遷
本位中郎將仍舊為州軍使默啜之寇北庭也公奔命
解圍軍聲大震加雲麾將軍右武衛將軍封介休縣開

國公食邑二千戶開元二年吐蕃入隴右掠坳牧公兵以奇勝寇不復蹤積甲山齊而有餘收馬谷量而未盡歸功廟算朝議多之拜羽林將軍持節隴右諸州節度大使兼鄯州都督河源軍使鎮西陲信國之藩屏坐北落亦王之爪牙故入奉期門而出寄分閫於是料敵無備間其師老潛軍一舉大俘九曲鎖甲文劍燹馬犂牛既獻戎捷遂頒朝賜乃兼鴻臚卿攝御史中丞封太原郡開國公加前食邑三千戶執憲總軍典屬乘障增爵

益邑遇厚恩深俄而六州羣胡相率大叛命公統隴右
之騎濟河曲之師鋒鏑爭先玉石俱碎拜左武衛大將
軍授一子官金銀器百事雜綵千段班師臨洮邁茲虐
疾嗟乎匈奴未滅宿志不申生也有涯死而猶視開元
九年十月二十二日薨於軍舍春秋五十有五蕃夷邊
鎮血面摧心悲慘風雲號慟山谷豈非良將視人如子
人亦視猶父乎皇帝憫焉詔贈涼州都督米粟五百石
錦帛五百段命都水使者張景佖備物護葬遵朝典也

惟公氣猛而性和量寬而精銳沈謀可以掩著蔡雄斷
可以奪鬼神故常糟粕韜鈴芻狗風角然其樹恩結信
立威用武烜赫如風濤震盪如雷雨戰必克攻必取每
有奏謁帝特稱歎孝文之得魏尚虜不足憂太祖之見
郭嘉知成吾事前後錫錦衣寶帶文馬素女爛其盈門
長鳴在廡感知己之主陳必死之力皇情西顧則九羌
豐鼓詔書北伐則六狄焚旗上成聖君之玄鑒下效武
臣之素節其竟也如此夫為人子立廟致敬祖考來格

不亦孝乎為人臣恢疆禦侮以勞定國不亦忠乎若然者歸義方於先人揚令名於後代可也嗣子英傑起復定遠將軍左領軍衛翊府中郎將假紫服金章河西節度副大使英竒朝散大夫前尚輦奉御英協遊擊將軍前京兆府勵行府右果毅都尉英彥朝議郎前左衛曹曹叅軍等咸善居喪而過哀或從王事而奪禮則知辛賢父子繼位將軍祭彤弟兄望叅師律去本不懸達也而新是謀權也嘉此武功創其宅兆以十年七月葬我

太原公夫人燉煌索氏祔焉禮也皇上念功以惜逝厚
終以遇存有詔詞人為其碑誌介士送葬即封征虜之
墳單于入朝當祭度遼之墓銘曰

洸洸將軍雄略冠羣平西征北震戎懾獯亭障卧鼓屯
田饋軍仗此白刃致彼青雲郭侯宴喜既多受祉元牡
黻衣清廟蠲祀鼎食金奏炮鼈膾鯉既來不庭有嚴天
子流沙博望羽林飛騎河曲迴兵臨洮舊趾手握金節
魂沈玉帳千里送喪三軍悽愴詔葬禮崇恩碑義豐生

為神將死為鬼雄身世一滅榮華萬空祁連之墓長旌
武功

唐故邠寧慶等州節度觀察處置使朝散大夫
檢校戶部尚書兼御史大夫賜紫金魚袋贈右僕
射史公神道碑

劉禹錫

僕射名孝章字得仁本北方之強世雄朔野其後因仕
中國遂為靈武建康人曾祖道德贈右散騎常侍封懷
澤郡王祖周洛銀青光祿大夫檢校太常卿兼御史中

丞北海郡王贈太子太保考憲成早以武勇絕人積功
至魏博節度使終於河中晉絳慈隰等州節度觀察使
檢校司徒兼侍中河中尹贈太保其薨也大臣中書令
晉國公裴氏為之碑其名益顯公即侍中之元子母曰
冀國夫人李氏幼而聰悟父母賢而加愛焉及長好學
遷善秀出儕輩鄴下諸兒號為書生元和中太尉愬為
魏帥下令掄材於轅門取大將家翹秀者為子弟軍列
於諸校之上公獨昌言願效文職太尉深竒之遂假魏

州大都督府叅軍長慶二年常山衆叛害其帥沂國公
田司徒於帳下沂公發迹於魏人猶懷之詔命其子布
以尚書授鉞統魏兵問罪於北疆且報家禍布既啓行
士氣不振渙然內潰獨與冗從之旅偃旗而歸百憤攻
中卒自引決先侍中時為中軍都知兵馬使兼御史中
丞全師在野闕然推戴之請為假侯以鎮定中貴人飛
驛上聞穆宗夜召翰林學士草詔書以真侯命之實有
魏土從衆而合權也是歲公自攝官轉本府士曹叅軍

兼監察御史賜朱衣銀印推恩以及子也一旦跪於父
母前進苦言曰臣竊惟大河之北地雄兵精而天下賢
士心侮之目河朔間視猶夷狄何也蓋有土者多乘兵
機際會非以義取今臣家父侯母封化為貴門君恩至
矣非折節礪行彰信於朝廷無以弭讖者之譏寤明君
之意節著於外福延於家乘時蹈機不可旋踵言訖泣
下數行父俞母贊天性交感三心既叶萬衆潛化天子
聞而嘉之曰彼真有子乃授檢校太子左諭德兼侍御

史充節度副使累遷至散騎常侍兼御史大夫賜金印
紫綬貳軍之政事如命卿弛張損益所以叅決潛革故
態人知嚮方大和二年滄景節度使李全略卒其子同
捷竊據故地詔下以文告弗革遂用大刑先侍中表請
率先諸侯使元子以督戰制曰可公承君父之命乃捐
其軀一舉而下平原壓滄壘由是加工部尚書及王師
凱旋上表願一識承明廬詔允遂赴闕下得覲便殿上
曰嚮吾始征滄州議者皆曰彼魏之姻也慮陰為寇謀

吾發使數輩以偵之其還也僉曰爾父瀝欵於賓筵爾
母抗詞於簾下願絕姻以立效其經始啓發出於爾心
今滄海砥平策勲之日宜貴爾三族命爾父為侍中遷
鎮於近地加爾禮部尚書析相衛澶三州為鎮以居之
俾爾一門大榮以誇天下公拜稽首謝父遷讓已爵禮
無違者翌日詔見於明庭人咸曰史氏之寵光古無有
也牙旗碧幢方指東道侍中以帳下生變聞泰極而否
當歌而哭迎柩於路仰天長號因葬於洛陽之邙山冀

國夫人拊焉寢苦枕塊以所仇同天為大酷未幾詔舉
金革之義起為右金吾將軍累表陳乞有司以違命督
之輿疾即路間歲擢授鄜坊丹延等州節度觀察處置
等使居四年遷鎮於滑一歲入為右領軍衛大將軍旋
改右金吾大將軍又授鉞於邠土孟秋至治所首冬邁
疾拜章入覲不克展和鸞筆革之儀薨於靖恭里之私
第享齡三十九當開成三年十月二十日上聞而悼之
不視朝一日贈尚書右僕射明年二月歸葬於洛都夫

人瑯琊王氏祔焉繼室深澤縣君博陵崔氏有一子曰
渙生七年而孤僕射之喪自復魄至葬當門戶備祭祀
建碑表皆縣君之能且命其家老具事功來請蔭不卹
家而憂幼嗣不知其先人之官業乞辭以傳於後也君
子以為知禮謹書之銘曰

斗極之下崆峒播氣終於侍中孔武且貴奉上致命宜
昌後嗣僕射承之良弓不墜耳煩鉦鼓心悅文字虎穴
之中生此騏驥大和紀元滄景不度子弄父兵跳踉海

孺有隣陰交蝟起雞連詔下薄伐良隅騷然時惟侍中
實統魏師蓄銳未發衆心危疑僕射為子陳謀盡詞興
言涕零有感尊慈絕姻效節精貫神祇滄波底寧王命
褒之乃遷元侯來鎮近畿乃昨元子別建旌麾一門四
節輝耀當時倏忽變生魏郊紛披喬木雖大盲風不知
干雲之臺列缺焚之哀哀孝嗣丁此大酷迎護幃輶葬
於東洛訴天觸地血染縑服禮有金革詔書敦促不遂
枕戈驟膺推轂雕陰白馬暨於邠谷雖榮三鎮不荷百

祿綺紈之間珪組纍纍如彼晨葩日中而萎有妻名家
有子稚齒行號執禮歸窆高里洛水之陽修邨之趾尊
卑穆敬幽顯同理舊松新栢亦象橋梓刻石紀功垂於
萬祀

唐文粹卷五十七

欽定四庫全書薈要卷一萬九千八百八十一集部

唐文粹卷五十八

宋姚鉉編

碑十 總七首

庶官四

唐刑部尚書致仕白居易神道碑 李商隱

唐吏部侍郎奚陟神道碑 劉禹錫

唐左拾遺翰林學士李白新墓碑 范傳正

唐吏部郎中高都公楊仲宣碑 席豫

牧守三

唐常州刺史獨孤及神道碑

崔祐甫

唐饒州刺史吳丹神道碑

白居易

唐和州刺史張擇神道碑

唐刑部尚書致仕贈尚書右僕射太原白公墓碑

銘 并序

李商隱

公以致仕刑部尚書年七十五會昌六年八月薨東都
贈右僕射十一月遂葬龍門子景受大中三年自潁陽

尉典治集賢御書侍大夫弘農郡君楊氏來京師胖
胖兢兢奉公之遺畏不克既乃件右功世以命其客取
文刻碑文曰

公字樂天諱居易前進士避祖諱選書判拔萃注秘省
校書元年對憲宗詔策語切不得為諫官補盤屋尉明
年試進士取故蕭遂州澣為第一事畢怙集賢校理月
中詔由右銀臺門入翰林院試文五篇明日以所試制
加段佑兵部尚書領涇州遂為學士右拾遺滿將擬官

請掾京兆以助供養授戶曹時上愛兵襄陽荊州入疏
獻物在約束外公密詆二帥且曰非善良後雖與宰相
不厭人禍其後禮官竟以多殺不辜謚于頓為厲李師

古襲父事逆務作項領以謾儕曹上錢六百萬贖文貞
故第以與魏氏公又言文貞第正堂用太宗殿材魏氏
歲臘鋪席祭其先人今雖窮後當有賢即朝廷覆一瓦
魏氏有分彼安肯入賊所贖第邪上由是賜錢直券以
居其孫在職三年每讌見多前笏留上輦是否意詔湔

別抉摩望及少年見天下無一事五年會憂掩坎廬墓
七年以左贊善大夫著吉武相遇盜殊絕賊棄刃天街
日比午長安中盡知公以次紙為疏言元衡死狀不得
報即貶江州移忠州刺史穆宗用為司門員外四月知
制誥加秩主客真守中書舍人叙緋受旨起田孝公代
恒陽孝公行贈錢五百萬拒不內燕趙相殺不已公又
上疏列言河朔畔岸復不報又貶杭州既至築堤扞江
分殺水孔道用肥見田發故鄴侯泌五井淳儲甘清以

變飲食循錢塘上下民迎濤祠神伴侶歌舞徙右庶子
出蘇州授祕書監換服色遷刑部侍郎乞官分司得太
子賓客除河南尹復為舊官進階開國九年除同州不
上改太子少傅申百日假又二歲得所薨官白氏由楚
入秦秦自不直杜郵事封子仲太原以有其後祖某鞏
縣令考季庚襄州別駕贈太保一女妻譚氏始公生七
月能展書指之無二字橫縱不誤既長與弟行簡俱有
名故李刑部建庾左丞敬休友最善居家以戶小飲薄

酒朔望晦輒不肉食攜鄧同韋楚白服遊人間姓名過
海流入雞林日南有文字國為中書舍人三日如建中
詔書上鄭公覃自代後為相稱質直文宗時文貞公果
有孫起使下數歲至諫議大夫賢可任為今上御史中
丞他日景受嘗跪曰大人居翰林六同列五具為相獨
白氏亡有公笑曰汝少以待其曾祖弟今右僕射平章
事敏中果相天子復憲宗所欲得開七關句絕城守四州
以集巨伐仲冬南至備宰相儀物擊跪齋粟給事寡嫂

永寧里中有兄弟家指嚮徒慕以信公知人集七十五
卷元相為序系曰

公之先世用談說聞肅代代優布蹤河南陰德未校公

有弟昆本枝不搖乃果敷舒匪骼匪臍噫

烏介反

其醇腴

於鄉泊邦取用不窮天子見之層陞玉堂徵徵其中上

汰唐禹帝為輦留續緒襞縷歲終當遷戶曹是取擘白

其華矚不痕緇

上聲

用從棄遣至道天子疇誰與伍率中

道止納筆懾麾綽三郡理既去刑部倏東其居大尹河

南翦其暴逋君有三輔臣有田畝臣衰君強謝不堪守
翊翊伸伸君子之文不僭不怒惟君子武君子既貞兩
有其矩孰永厥家曾祖之弟坤柄巽繩以就大計匪哲
則知亦有教詔益褒其收握莠而導刻詩於碑以報百
世公老於東遂葬其地

傷子辭

附

弘農楊氏

予有令子儉衣削食以紀先功志刊貞石彼蒼不遺俾
善莫隆今子建立痛冤無窮

唐尚書吏部侍郎贈司空奚公神道碑銘 并序

劉禹錫

嗚呼有唐清臣尚書吏部侍郎奚公貞元十五年十月
甲子薨於位詔贈禮部尚書太常考行諡曰某是歲臘
月丁酉葬於萬安縣之某原後三十有四年子為諸侯
為大夫門戶有煒於是門下生琢石紀德揭於新阡云
公諱陟字殷衡其先在夏為車正以功封於薛下古以
降為譙郡人或因仕適楚復之秦今為京兆人隋唐之

際再世以明經為博士家有賜書曾祖簡亦以文學為
太子司議郎大父乾繹仕至光州刺史烈考諱某有道
而尚晦終徐州司功叅軍贈和州刺史由子貴也天以
大運生萬物而以正氣鍾賢人至和來宅其德乃具公
實有焉幼而擢陵茗之秀長而成清廟之器羣倫月旦
咸以第一及從鄉賦洎昇名太常果居上第明年詔郡
國徵賢良設四科以盡材公居文詞清麗之目授弘文
館校書郎時德宗新即位聲烜虜庭西戎畏威底貢內

附詔諫議大夫崔河圖持節即虜帳以報之使臣欲盛
其賓寮以自大遂嘿表公為介授大理評事除書到門
公方為人子不敢許以遠稱病弗果行歸寧壽春養志
盡敬丞相楊炎勇於用才擢公為左拾遺奉安輿而西
未幾再集茶蓼居從後喪將闋是歲建中四年京師急
變黃屋順動狩於巴梁公徒行間道以歸王所既中月
而詔授起居郎充翰林學士創鉅愈遲病不拜職改太
子司議郎從大駕迴入尚書為司金元士且叅權筦之

務有頃持愍冊宣恩於蘇門將行錫銀朱於青蒲上復
命稱旨轉吏部員外郎是曹在南宮為眉目在選士為
司命公執直筆閱簿書紛拏盤錯一瞬而剖時文昌缺
左右丞都曹差重遂轉左司郎中尋遷中書舍人執事
者繫公識精以斟酌大政非獨用文飾也會江淮間民
被水禍上愍焉特命公宣撫之許以便宜及物赤車所
至如東風變枯條其利病復奏咸可轉刑部侍郎時主
計臣延齡以險刻貴倖而與京兆尹相惡以危事中之

坐謹已又逮繫其吏峻繩之事下司寇主奏議者欲文致而甘心焉公侃然持平挫彼嶽嶽君子聞之善其知道不私刑曹既清以餘力兼領選事居一年授權知吏部侍郎又一年即真是秩言能審官者本朝有裴馬盧李四君子物論以公媿焉時得疾發癰有國醫方直禁中上促遣如第且飭之曰某賢臣也悉術以治之及有司以不起聞震悼加等娶瑯琊王氏石泉公之曾孫友婿皆一時彥士長子某早不祿第二子敬則歷太僕少

卿今為濮州刺史兼御史中丞賜金紫以連最就加貴
秩俾視九卿第三子敬玄以詞藝似續登文科歷左補
闕今為尚書刑部郎中第四子炅舉進士最小子咸砥
礪纂修宜為名公家子其邁德垂裕之光乎公少以名
器自任及顯達急於推賢視其所舉則在西省薦權丞
相由右掖掌訓辭在中銓表楊僕射由地曹綜吏部二
公後為天下偉人凡執文章權衡以揣量多士一入中
禁考策詞三在天官第章句披沙剖璞由我而顯者落

落然居多推是風鑒移於大治則鎔範之內無非祥金
嗟乎天不遐其福而孤民望使由庚之什不作於貞元
中惜也初公既終詔贈大宗伯後以第三子在郎位被
霈澤再追褒至司空故昔之葬儀用常伯而今之碑用
三公云銘曰

仁麟智龍為瑞一辰未若君子瑞於人倫惟唐德宗道
類漢宣督責繩下風稜言言公丁斯時籍在雋賢從難
表節執羈而還帝曰汝器黃流瑟然可為大僚左右化

源乃飾王度乃馳轡軒既執刑柄亦操吏權陽和熙熙
貯在顏間守法持正嶷如秋山火不侵玉倖臣畏伏鳳
鳴祥煙臬噪低跽帝方倚用天不假年公寐無寤其名
愈遠門人達者赤舄玄衮公居甚卑其德愈尊兩子朝
服駢驅朱輪佳城何在胄貴之里螭首龜趺德輝是紀
嗚呼後人下拜於此

唐左拾遺翰林學士李公新墓碑銘

并序

范傳正

騏驥筋力成意在萬里外歷塊一蹶斃於空谷唯餘駿
骨價重千金大鵬羽翼張勢欲摩穹昊天風不來海波
不起塌翅別島空留大名人亦有之故左拾遺翰林學
士李公之謂矣公名白字太白其先隴西成紀人絕嗣
之家難求譜牒公之孫女搜於箱篋中得公之亡子伯
禽手疏十數行紙壞字缺不能詳備約而計之涼武昭
王九代孫也隋末多難一房被竄於碎葉流離散落隱
易姓名故自國朝以來編於屬籍神龍初潛還廣漢因

僑為郡人父客以逋其邑遂以客為名高卧雲林不求
祿仕公之生也先府君指天枝以復姓先夫人夢長庚
而告祥名之與字咸所取象受五行之剛氣叔夜心高
挺三蜀之雄才相如文逸瓌竒宏廓拔俗無類少以俠
自任而門多長者車常欲一鳴驚人一飛冲天彼漸陸
遷喬皆不能也由是慷慨自負不拘常調器度弘大聲
聞於天天寶初召見於金鑾殿玄宗明皇帝降輦步迎
如見園綺論當世務草答蕃書辨如懸河筆不停綴玄

宗嘉之以寶牀方丈賜食於前御手和羹德音褒美褐
衣恩遇前無比儔遂直翰林專掌密命將處司言之任
多陪侍從之遊他日泛白蓮池公不在宴皇歡既洽召
公作序時公已被酒於翰苑中仍命高將軍扶以登舟
優寵如是既而上疏請還舊山玄宗甚愛其才或慮乘
醉出入省中不能不言温室樹恐掇後患惜而遂之公
以為千鈞之弩一發不中則當摧幢折牙而永息機用
安能做碌碌者蘇而復上哉脫屣軒冕釋鞿韉鎖因肆

情性大放宇宙間飲酒非嗜其酣樂取其昏以富作詩
非事於文律取其吟以適好神仙非慕其輕舉將不可
求之事求之欲耗壯心遣餘年也在長安時秘書監賀
知章號公為謫仙人吟公烏棲曲云此詩可以哭鬼神
矣時人又以公及賀監汝陽王崔宗之裴周南等八人
為酒中八仙朝列賦謫仙詞百餘首俄屬戎馬生郊遠
身海上往來於斗牛之分優游沒身偶乘扁舟一日千
里或遇勝境終年不移時長江遠山一泉一石無往而

不自得也晚歲渡牛渚磯至姑孰悅謝家青山有終焉
之志盤桓利居竟卒於此其生也聖朝之高士其往也
當塗之旅人代宗之初搜羅俊逸拜公左拾遺制下於
彤庭禮降於玄壤生不及祿歿而稱官嗚呼命歟傳正
生唐代甲子相懸常於先大夫文字中見與公有潯陽
夜宴詩則知與公有通家之舊早於人間得公遺篇逸
句吟詠在口無何叨蒙恩獎庶問宣池按圖得公之墳
墓在當塗邑因令禁樵採備灑掃訪公之子孫欲申慰

薦凡三四年乃獲孫女二人一為陳雲之室一乃劉勸之妻皆編戶賸也因召至郡庭相見與語衣服村落形容朴野而進退閒都應對詳諦且祖德如在儒風宛然問其所以則曰父伯禽以貞元八年不祿而卒有兄一人出遊一十二年不知所在父存無官父歿為民有兄不相保為天下之窮人無桑以自蠶非不知機杼無田以自力非不知稼穡況婦人不任布裙糲食何所仰給儷於農夫救死而已又不敢聞於縣官懼辱祖考鄉閭

逼迫忍恥來告言訖淚下余亦對之泣然因云先祖志
在青山遺言宅兆頃屬多故殯於龍山東麓地近而非
本意墳高三尺日益摧圯力且不及知如之何聞之憫
然將遂其請因當塗令諸葛縱會計在州得諭其事縱
亦好事者學為歌詩樂聞其語便道還縣躬相地形卜
新宅於青山之陽以元和十二年正月二十二日遷神
於此遂公之志也西去舊墳六里南抵驛路三百步北
倚謝公山即青山也天寶十二載勅改名焉因告二女

將改適於士族皆曰夫妻之道命也亦分也在孤窮既
失身於下俚仗威力乃求援於他門生縱偷安死何面
目見大父於地下欲敗其類所不忍聞余亦嘉之不奪
其志復井稅免徭役而已今士大夫之葬必誌於墓有
勲庸道德之家兼樹碑於道余才術貧虛不能兩致今
作新墓銘輒刊二石一寘於泉扃一表於通路亦峴首
漢川之義也庶芳聲之不泯焉文集二十卷或得之於
時之文士或得之於宗族編緝斷簡以行於代銘曰

嵩嶽降神是生輔臣蓬萊譴真斯為逸人晉有七賢唐
稱八仙應彼星象唯公一焉晦以麴蘖暢於文篇萬象
奔走乎筆端萬慮泯滅乎罇前卧必酒甕行惟酒船吟
風詠月席地幕天但貴乎適其所適不知夫所以然而
然至今尚疑其醉在千日寧審乎壽終百年謝家山兮
李公墓異代詩流同此路舊墳卑庫風雨侵新宅爽塏
松栢林故鄉萬里且無嗣二女從民永於此猗歟琢石
為二碑一藏幽隧一臨岐岸深谷高變化時一存一毀

名不虧

唐故朝請大夫吏部郎中上柱國高都公楊府君

碑銘 并序

席 豫

夫靈鎮三峰倚京師而西峙滎河一曲抱華陰而東注
故川嶽氣交雲雨時出感降才傑紛綸元勲冠世為強
家宅茲沃土者其惟弘農楊氏焉曰我伯胤厥自唐叔
關中相府乘朱輪者十人洛下儒門登袞職者四代慶
靈不隕以生我高都公公諱仲宣字蔓後漢太尉震之

二十代孫也自高祖至於大父並名播海內迹存朝端
舊史前碑其詳之矣烈考皇孫刑部尚書魏國忠公元
琰屬姦臣擅命明辟應期功濟中興安劉氏者周勃禮
優歸老論叔向者祁奚出處全身忠貞盡節公即尚書
府君之第三子也粵在幼齡夙有至性事魏公莒國夫
人以孝聞宗族推稱州閭籍甚清真邁俗秀楚不羣氣
和可親色厲難犯言必合禮動不違仁集七略之書名
高漢閣作三都之賦價重洛城未弱冠以通經為修文

生授右千牛光朝選也秩滿補太廟丞以親累出為蘄
州司戶叅軍屬先尚書辭滿告歸公罷官就養潁曲別
業地連嵩高丘中有華孝子絜白之興川上有水漁父
滄浪之歌温清獲申隱淪兼遂橫為酷吏王勗所誣陷
貶授雋州臺登縣尉劔南節度使益府長史韋抗奏公
為管記飛書之急倚馬立成尋有詔停官歸侍俄丁尚
書府君憂鞠凶而降哀毀骨立殆不勝喪取全於禮服
闋從常調吏部侍郎魏奉古早以文伯期於王佐乃授

河南府河陽縣尉尋應藻思清華舉今上親試對策甲
科除蒲州司法叅軍丁呂國夫人憂杖而後起公居魏
公之喪也服闋不仕為叔父瑤所敦逼不獲已而應命
其年糊名考判公居上等乃擢拜監察御史獬豸之角
初見觸邪雞棲之車還聞嫉惡坐剛直出為汾州孝義
縣令前宰無良下氓失業稼穡之地半為荒疇桑榆之
人多在逋數公曉諭歸本流亡盡復既富而教厥土有
年故得雉馴郊田鸞降庭樹刺史蕭恕乃圖畫其像郵

傳以聞天恩疇庸璽書褒美乃除華州下邽縣令辭疾
罷職求歸養間無何除河南鞏縣令所歷為政有逾於
前尋遷禮部員外郎歷左司員外郎春官之屬以蘇神
人左轄之佐以正綱紀乃轉吏部員外郎九品之曹一
臺之劇有簿書以旌淑慝擇刀筆以決否臧於是予以
公滅私秉心匪石剖疑析滯揮翰如流選部以清繫公
是賴尋遷本司郎中乃統胥徒是稱小選峻以風檢請
託不行絕其闕梁僥倖自息若乃見理之速持事之堅

雖有責育之勇金張之勢曾無恐懼不可動搖不陟台階奄先泉壤悲夫以元和二十九年七月五日構疾終於萬年永寧里之私第春秋四十有九以其年十月十七日歸葬於閩鄉牧馬原禮也惟公自家刑國曰仁與義厚利者常流之所重公以先人邑人盡分諸孤善交者衆人之所艱公以結下朋遊曾無凡客士有險詖比隣不通人或急艱傾家以濟素懷儉約雅好真如不服綺紈不食葷血雖粉闥有閱朱紱斯皇不易貴賤之心

能全始終之節嗟乎譽高千載道屈一時漢之崔駰官
終邑宰魏之管輅位止府丞天乎與才而人乎無命自
古所歎豈獨高都而已府公所著文集十卷盛行於代
嗣子輪行太常寺奉禮郎次子轅轍麟輯等永惟過庭
之訓式遵卜宅之禮靈輻戒道哀挽及闕靈堂東拓地
惟鄉縣拱樹西靡心存帝京銘曰

河之靈華之精人之傑國之楨年不永位未亨閉泉路
兮冥寞空歲陰兮崢嶸

唐故常州刺史獨孤公神道碑銘

并序

崔祐甫

昔劉向稱賈誼言三代與秦亂之意其論甚美達於國體雖古之伊呂未能遠過又稱董仲舒有王佐之材雖伊呂亡以加管晏之屬殆不及也於戲二君以偉才當盛漢之崇而位止於下國二千石祐甫聞於先君僕射曰主恩非臣下之所圖天命豈生人之所制有唐碩量深識之士曰獨孤常州諱及字至之河南洛陽人皇朝

左千牛元慶之曾孫蔡州長史思暎之孫殿中侍御史
贈祕書監通理之第四子仕而遭時鵠立於朝建旗東
夏三著嘉績嗚呼痛乎奄忽捐館其時也大曆十二年
夏四月二十九日其地也常州之路寢其壽也五十三
年中朝名公素見知者後進之士聞義嚮風者洎濠舒
常三州之百姓莫不填膺流皆不宴不相泱辰彌月厚
而惜之者徃徃失聲出涕施若公有子朗郁等未齒厥
兄檢校水部員外郎兼侍御史汜方佐淝河東帥聞喪

來奔半旬而至惋毒之甚如不欲生既受吏人賓客之
弔乃忍死謀事以六月六日引使君之柩去常州歸洛
陽其年歲次丁巳十月朔七日葬我使君於河南府壽
安縣某原先祕監之塋以夫人博陵縣君崔氏祔焉禮
也水部曰天之降災害於我家仲叔季盡矣吾將老矣
吾弟常州之子未立今不刻石表墓則常州之令名何
以傳於後乃託我故人叙而銘之常州稟元和以生幼
有成人之量祕監府君親授以孝經常州一覽成誦祕

監問曰汝志於何句對曰立身行道揚名於後世是志也自是徧覽五經觀其大義不為章句學成童丁祕監憂勺飲不入口者累日先夫人同郡長孫氏諭以不可減性之義由是微進饋粥杖而後起免喪加於人一等鄉族稱其孝焉長孫夫人高行明識訓導甚至常州漸教成器卓然有立著延陵論君子謂其評議之精在古人右天寶末以洞曉玄經對策上第超拜華陰縣尉著古函谷關仙掌二銘格高理精當代詞人無不畏服俄

屬中原兵亂避地於越丁太夫人憂毀瘠過禮既外除
江淮都統使戶部尚書李峘奏為掌書記授左金吾衛
兵曹叅軍軍旅之事非其所好未幾返初服今上即位
下詔收俊茂舉滯淹政之大者以公為左拾遺凡所諫
諍直而不訐婉而不撓屬藁訓詞不傳於外遷太常博
士時新平大長公主之子裴防尚永清公主初以太子
少傅裴遵慶為婚主將行五禮公實相馬中使口宣詔
旨易之大長主後夫姜慶初常州曰婚姻之禮王化之

階以異姓之人主之不可甚矣某不奉詔中書令汾陽
王時為五禮使從焉又百官薨卒定諡之際綜數名實
皆居其當嚴河南郢訓答呂荊州誣諡議博而正當時
避之遷尚書禮部員外郎受詔考第吏部選人詞翰旌
別淑慝朝野稱正上方大卹黎庶精選牧守以公為濠
州刺史平其徭賦恤其冤弱課績聞上加朝散大夫遷
舒州刺史舒境瀕江傍山羣盜所聚或蟠結林藪或越
赧城寺公惠以柔之武以警之釋矛服耒盡為良俗其

他如在濠之政居一年璽書勞問就加尚書司封郎中
錫以金章紫綬屬江南旱歉比境之人流庸甚衆公忠
心以撫舒獨完安天子聞而休之擢拜常州刺史常州
當全吳之中據名城沃土兵興之後中華翦覆吳中州
府此焉稱大故朝之選牧恒屬意焉公宣中和平易之
教務振人毓德之體百姓蒙化遷善不知所以安而安
吏不忍欺路不拾遺餘糧棲畝膏露降之公平生聞人
之善必揄揚之氣盡與之不啻若身得之後進有才而

業未就者教誨誘掖之惟日不足公之文章大抵以立
憲誠世褒賢過惡為用故論議最長其或列於碣頌流
於詠歌峻如嵩華盛如江河清如秋風過物邈不可逮
公有集二十卷行於代若夫贊堯舜禹湯之命為誥為
典為謨為訓人皆許之而不吾試論道之位宜而不陟
前是公之仲兄季弟伯姊三年之間繼歿執天倫之喪
如荼如蓼竟以無祿天何不仁然則賈與董名位不盡
其才吾先君之歎主恩天命斯見矣其銘曰

常州之孝行為大蒸蒸翼翼以敬以愛友於兄弟如捧
如戴常州之義篤於友用之有常行之可久扶危拯溺
爾身我手常州之才施於政撫柔三部以仁為柄龔遂
國僑千古迭映常州之文究其本質取其正艷從其損
在星之緯在衣之袞常州之年止中身去昭昭之盛世
與萬鬼而為鄰白馬江上青鳥洛濱鵲鴿在原嗟爾元
昆縲衽霑血長號訴冤纂述遺美謂余不諼我覲之子
將二十年相投藥石胡疹不痊譬我於池子為之泉譬

我於桐子為之弦榮不獨遂難不隻全如何淑明摧馥
碎堅廡衣楚挽徘徊墓田望之不見赴之無緣狸首斑
如女手拳如天如天如泣涕連如

唐饒州刺史吳君神道碑銘

并序

白居易

汨市朝溺妻子非達也困山林擯血屬非達也若有人
與羣動處一代間彼為彼我為我不自潔不自污不巢
許不伊呂水其心雲其身浮沈消息無往而不自得者
其達人乎吾友吳君嘗從事於斯矣君諱丹字真存太

子通事舍人覽之曾孫睦州司馬庶之孫太子宮門郎
贈工部尚書詮之長子以進士第入官歷正字協律郎
大理評事監察殿中侍御史太子舍人水部庫部員外
郎都官駕部郎中諫議大夫大理少卿饒州刺史歷職
義成軍節度判官浙西道節度判官潼關防禦判官鎮
州宣慰副使匭函使階至中大夫勲至上柱國賜紫金
魚袋君讀書數千卷著文數萬言寶曆元年六月某日
薨於饒州官次其年十一月某日葬於常州晉陵縣仁

和鄉北原從志也君生四五歲弄泥沙時所作戲輒象
道家法事八九歲弄筆硯時所出言輒類詩家篇章不
自知其然蓋宿習儒玄之業明矣弱冠喜道書奉真錄
每專氣入靜不粒食者累歲顛氣充而丹田澤飄然有
出世心既壯在家為長屬有三幼弟八稚姪嗷嗷慄慄
不忍見其饑寒慨然有干祿意乃曰肥遯不可以立訓
吾將業儒以馳名名競不可以怡神吾將體玄以育德
凍餒不可以安道吾將強學以徇祿祿位不可以多取

吾將知足而守中絲是去江湖來京師求名得名求祿
得祿身榮家給之外無長物無越思素琴在右黃庭在
左澹乎自處與天和終始履仕塗二十七年享壽命八
十二歲無室家累無子孫憂屈伸寵辱委順而已未嘗
一日感感其心顏以至於歸全反真故予所謂達人之
徒歟信矣仲弟湖州長史某以予辱與其兄游既為同
門生又為同舍郎周知初終託為碑記噫先生之道吾
能引古以明之銘曰

漢中大夫東方曼倩夏侯湛高之作廟貌贊唐中大夫
真存先生白樂天知之作神道銘嗚呼二大夫異代而
同塗其皆達者乎

唐故通議大夫和州刺史吳郡張公神道碑銘

并序

張之為著姓尚矣自漢太傅良侍中肱晉司空華丞相
嘉以降勲賢軒冕歷代不乏肱避地渡江始居於吳故
其子孫稱吳郡人嘉以孝悌聞於郡故其所居號孝張
里嘉之曾孫裕在宋為司徒即公五代祖也司徒之孫

儔在隋為吳郡都督即公曾王父也台州臨海令諱鵬
即公之大父也袁州司馬諱孝績即公皇考也或以人
物著或以閭閻稱迄今為江南右族公諱擇字無擇未
冠丁袁州府君憂廬於墓晝號而夜泣者三年有靈芝
醴泉出焉既冠好學能屬文從鄉試登明經第既第應
制舉中精通經史科補弘文館校書郎調左金吾錄事
換杭州錄事參軍在杭州前後詰偽制補吏者三十八
人駁假年侍老者二十人舉而正之人伏其明會劉幽

求來為刺史舉課上聞詔授絳州錄事叅軍絳之郡丞
有主壻者怙寵侮法豪奪人利公數其罪露章奏之章
下丞相姚元崇竒之致書褒美尋改太原府功曹叅軍
給事中張昶為江淮安撫使表公正直奏署部從事吏
部尚書陸象先為河東按察使狀公清白奏授懷州獲
嘉令以不如柔不吐剛得罪繇是左遷鄂州司馬移深州
司馬轉虢州長史時上方思理詔求二千石之良者時
宰以公塞詔擢拜和州刺史公之在郡奉詔條卹人隱


而已不知其他無何水潦害農公請蠲穀籍之損者什七八時李知柔為本道採訪使素不快公之剛直密疏誣奏以附下為名遂貶蘇州別駕老幼攀位而遮道者數百人信宿方得去移曹州別駕歲餘謝病歸老於家天寶十三載正月二十一日終於東都利仁里私第其年二月十二日葬於河南府伊闕縣中李原享年八十三噫公生天地間八十有三年可謂壽矣其間當明皇馭天下四十有五年可謂時矣有其才得其壽逢其時

然職不過陪臣秩僅至郡守凡所貯畜鬱而不舒嗚呼
其命也夫公之文學常為賀知章賈彥璿許之公之諒
直常為李邕張庭珪稱之公之政事又為劉姚張陸推
之夫以八君子之力援之而不足以一知柔之力排之
而有餘阨窮不振以至沒齒嗚呼其命也夫古人云道
不虛行又云其後必有達者故公之子大理評事誠以
節行聞於時公之孫戶部侍郎平叔以才位光於國報
施之道信昭昭矣不在其身則在子孫相去幾何哉長

慶二年某月某日平叔奉祖德揭而碑之居易據家狀
序而銘之其詞云

有木有木碩大而長破為楠杙不作棟梁有驥有驥規
行矩步辱在短轅不駕大輅嗚呼噫嘻公亦如之將時
不我遇而我不過時勿謂已矣天錫多祉既賢其子以
濟其美又才其孫以大其門苟無先德孰啓後昆

唐文粹卷五十八



總校官庶吉士臣張能照
校對官檢討臣王鍾健
謄錄監生臣王心仁